

# (钦定)平定七省方略

北京中国书店印行





欽定勦平捻匪方略卷三百十二 戊辰年

閏四月十一日 戊午 羅惇衍鍾岱崇厚奏言 臣等

接據探報捻匪由山東回竄果橋一帶已至滄  
州南界減河防務喫緊潘鼎新現已督帶全軍  
向南進勦減河僅有楊鼎勳一軍並劉景芳數  
營分布形勢空虛 臣等訪聞本地紳耆減河下  
游通海之路久經淤塞前經潘鼎新開放減河

石壩用運河水灌入下游因劉慶莊以下地勢  
漸高難以引水未能達海兼有山東海豐縣直  
赴大沽海口捷徑一條又有地名岑子頭大路  
一條可以直通天津葛沽鹹水沽等處臣崇厚  
當卽揀派知縣連興前赴祁口並減河下游周  
厯查勘所有減河營牆自石壩起至周慶莊止  
約有一百一二十里業已築有營牆下游至祁

口海河約有四五十里水勢散漫深不過一二尺其岑子頭大路並未淹沒現在散漫之水並海河潮水深淺不同難以施工又無兵隊防守空虛可慮查現在東省運防布置周密兵力亦厚賊匪被勦情急時思竄突聞上年膠萊河潰圍之處卽係海灘前車可鑒臣等再四熟籌若將津郡防兵分撥減河恐彼處未能嚴密此處

集賢堂卷之三 二  
先已空虛若專防津郡置減河於不顧恐賊由  
減河下游海灘繞越則海河一帶大沽葛沽均  
屬喫緊阻我糧道關繫匪輕若折向西北則津  
郡防務亦形喫重滄州以北運河處處可以搶  
渡是減河之防實係有關大局應請

飭下左宗棠李鴻章迅撥大隊赴減河下游海灘處  
所查勘地勢扼要駐紮此項官兵專令防守海

灘不得調往他處儻令賊匪從此北竄卽惟防守之員是問至滄州地方東可以控減河西可以顧全運臣等既有所見不敢不據實直陳

同日丁寶楨奏言臣至東昌後與英翰郭松林而商分段設守自臨清起至魏家灣六十餘里由皖軍駐防自魏家灣至東昌府城南七十餘里山東軍駐防自東昌府城南至張秋鎮九十

餘里由淮軍駐防臣於商定後嚴飭王心安等各營督率勇丁立限趕修長牆四月二十五日探賊已由平原高唐竄至清平博平距河僅數十里當飭諸軍整備迎擊幸張秋黃水入運之處先經李鴻章派營挑挖正值啟壩之際黃流忽漲運河水增數尺各軍乘勢晝夜施工王正起莫組紳與張曜宋慶等軍亦先後趕到賊復

折竄東南二十八日王正起等軍追及於荏平  
南關遇賊接仗頗有斬獲賊仍敗向禹城平原  
一帶奔竄各軍躡蹤緊追現在河牆一律完竣  
惟倉猝辦理不無低薄之處臣復督令各營加  
高培厚牆外濬濠樹柵藉資扼守英翰郭松林  
所分各段亦已修築竣事仍各飭防軍逐日加  
修用期鞏固現在銘軍已抵東昌李鴻章飭令

駐守運防騰出郭松林一軍作爲遊擊之師數  
日內卽可出勦至王正起莫組紳兩軍追逐將  
及兩月已覺疲勞臣亦擬調該軍回守運防換  
出王心安一軍會同郭松林等軍出勦俾士氣  
常新於防勦兩有所益刻據探報賊仍游弋於  
德平陵縣一帶王正起莫組紳張曜宋慶劉松  
山各軍追逼甚緊期於遇賊卽擊迅殄賊氛至

此次在平接仗陣亡之把總吳永泰應請

飭部從優議卹均奏入

上命軍機大臣傳諭左宗棠李鴻章丁寶楨崇厚曰  
臨清東昌運防經東皖淮各軍趕築長牆分段設  
防足資扼守惟自臨清東北至德州一帶運防事  
宜尙未籌及李鴻章當與丁寶楨等設法兼顧以  
期布置周密毋任賊騎乘隙竄渡張曜宋慶與王

正起等軍由清平博平等處追及賊股截其竄撲  
運河之路賊復折竄德平陵縣等處著李鴻章督  
催前敵各營與丁寶楨所部各軍儘力窮追並分  
路兜剿依限滅賊銘軍現抵東昌郭松林所部休  
息已久並著李鴻章飭該提督進兵追剿作爲游  
擊之師會合前敵各軍迅殲窮寇毋稍遷延在平  
接仗陣亡之把總吳永泰著交部從優議卹減河

營牆自石壩起至周慶莊止雖已興築其周慶莊  
以下至初口海河約四五十里水勢散漫深不過  
一二尺岑子頭大路並未淹沒該處營牆未立兼  
無兵隊駐守勢極空虛現潘鼎新一軍向南進剿  
僅有楊鼎勳並劉景芳數營分布殊屬不敷防守  
著左宗棠李鴻章趕緊撥兵前赴減河下游海灘  
處所扼要駐防毋得稍涉疏虞並著李鴻章檄令

潘鼎新所部由北向南壓勦儻任賊蹤紛竄搶渡  
滅河是潘鼎新既不俟接替有人置河防於不顧  
又不能遇賊痛擊遏其北竄朝廷必當重治其罪  
崇厚亦當設法疏通劉慶莊以下河道並添募練  
勇扼守以助兵力所不及東省所練西丹馬隊尙  
有一千五百名現在當已練熟能否得力著丁寶  
楨迅速具奏

丁寶楨又奏言據署海豐縣知縣劉輅稟報本年四月初九日探聞捻逆擾及直隸之鹽山慶雲兩縣分股亂竄勢將撲犯縣境當卽調集兵勇民團扼要嚴防一面派役分投確探十一日子刻據探邊馬百餘匹竄入縣境之棗園橋地方該員聞信商令教職典史率領民團登陴固守自與汎弁督率兵勇鄉團前往迎剿該逆大

股已蠶擁而來該員與汎弁奮力抵禦衆寡不敵以致紳士王毓寶等立時陣亡兵勇團丁陣亡多名該員與汎弁亦各身受重傷正在指揮兵勇鄉團轉戰閒忽有另股賊匪由城牆缺處闖入城內該員聞警卽與汎弁帶隊馳回縣城會同教職典史與賊巷戰賊始敗竄出城會合城外之賊由南竄去立將城池收復教職典史

亦各身受重傷查點監犯因變逸出者十名庫  
亦被劫惟倉廩未動等情查海豐縣被賊闖入  
雖未占踞而知縣典史汎弁均有守土之責且  
本年正月間捻逆竄至晉豫時臣以該縣城垣  
殘破恐有疏失飛飭趕緊修補以資守禦乃該  
署縣劉輅並不遵照認真修理迨賊匪竄入縣  
境又不能竭力堵禦致被闖入城內殊堪痛恨